



Sertai aktiviti anjuran MPP, universiti

Pelajar yang tidak pulang ke kampung memilih untuk menyertai aktiviti

Oleh Nas Norziela Nasbah
nasnorziela@bh.com.my

Arau: Hampir semua kampus universiti awam (UA) selesai menjalani peperiksaan untuk semester ini dan pastinya golongan yang tidak sabar untuk ‘berehat’ seketika setiap kali menjelangnya cuti semester adalah pelajar.

Satu perkara yang mahasiswa sedar cuti semester adalah ruang rehat mereka untuk bebas daripada jadual kuliah, peperiksaan dan buku.

Sememangnya kebanyakan pelajar memilih untuk terus pulang ke kampung halaman tidak kurang juga yang memilih untuk menyertai aktiviti yang mungkin direncanakan oleh pihak universiti melalui Majlis Perwakilan Pelajar (MPP) masing-masing.

Bagi Yang Dipertua (YDP) MPP Universiti Malaysia

Pahang (UniMAP) 2018/2019, Muhammad Amir Harith Abdul Jalil, antara aktiviti yang dilaksanakan oleh pihaknya adalah dengan menyelesaikan beberapa isu berkaitan kebajikan mahasiswa yang sentiasa jadi perhatian MPP.

Katanya, dengan adanya pelajar diploma yang baru memulakan pengajian, amat penting untuk melaksanakan beberapa aktiviti berkaitan dengan universiti.

“Terdapat juga beberapa aktiviti yang akan dilaksanakan mengikut perancangan antaranya, Family Day Diploma, Persidangan Mahasiswa UniMAP dan Foodbank.

“Fokus terhadap kebajikan mahasiswa yang terdekat adalah mengenai Denai Mahasiswa yang menghubungkan jalan dari Kolej Kediaman Tuanku Tengku Fauziah ke Dewan Kuliah,” katanya.

Mengenai cadangan pihaknya kepada pengurusan universiti, bagi tujuan memanfaatkan cuti semester pelajar, Muhammad Amir Harith, berkata menjadi harapan MPP UniMAP untuk melihat peluang dapat diberikan kepada pelajar untuk bekerja dalam bidang berkaitan.

“Sebagai pelajar, kami mengharapkan agar pihak MPP dan pengurusan universiti dapat membuka peluang untuk mahasiswa bekerja



Muhammad Amir Harith

sementara dalam bidang yang kami pelajari dan mengadakan beberapa aktiviti luar bagi mengasah kemahiran komunikasi dan berfikir secara kritikal.

“Ini adalah kemahiran yang paling diminta dalam industri. Di samping itu kami mengharapkan agar lebih banyak program berimpak tinggi dapat dijalankan untuk kelestarian mahasiswa di universiti,” katanya.

Sementara itu, YDP MPP Kolej Vokasional Sepang, Muhammad Nur Farhan Norazman, berkata MPP memainkan peranan penting seperti mengadakan aktiviti khidmat masyarakat di luar kawasan kolej setibanya cuti semester.

“Selain itu, pihak kami juga turut mengadakan lawatan penanda aras di setiap

pusat pengajian awam seperti Universiti Putra Malaysia (UPM), Universiti Kebangsaan Malaysia (UKM) dan universiti Islam Antarabangsa Malaysia (UIAM).

“Lawatan ini bertujuan memberi pendedahan dan mengisi masa lapang pelajar yang memilih tidak pulang ke kampung sewaktu cuti semester mereka, selain pengenalan kepada ahli MPP akan sistem atau peluang pendidikan yang ada,” katanya.

Muhammad Nur Farhan berkata, usaha pelajar kolej memanfaatkan cuti semester mereka dengan bekerja sambilan pada cuti semester atau hujung minggu amat berfaedah memandangkan status pelajar bukanlah penghalang besar untuk menjana pendapatan sampingan.

“Jika pelajar sekolah sudah mula bijak menjana pendapatan dengan berniaga secara kecil-kecilan apatah lagi golongan pelajar kolej.

“Apa yang menarik lagi, pelajar Kolej Vokasional Sepang ini semuanya memiliki kemahiran tinggi mengikut bidang masing-masing.

“Lebih menarik apabila ada pelajar yang mengambil peluang untuk bekerja di bengkel (jurusan automatik) dan butik pakaian (fesyen) dan bidang sajian makanan (kulinari),” katanya.